

Na osnovu člana 53. Zakona o igrama na sreću („Službene novine Federacije BiH“, br. 48/15 i 60/15), federalna ministrica finansija – federalna ministrica financija donosi

PRAVILNIK
O PROSTORNIM, TEHNIČKIM I DRUGIM USLOVIMA ZA PRIREĐIVANJE
TOMBOLE – BINGO U ZATVORENOM PROSTORU

I. OPŠTE ODREDBE

Član 1.

Ovim Pravilnikom se propisuju minimalni prostorni, tehnički i drugi uslovi za priređivanje igara na sreću Tombola - Bingo u zatvorenom prostoru (u daljem tekstu: Tombola), način izdavanja, evidentiranja i prodaje tombolskih kartica, te sadržaj i izgled tombolskih kartica.

Član 2.

Tombolu mogu priređivati sportska društva i sportski savezi sa sjedištem na teritoriji Federacije Bosne i Hercegovine, koji su registrovani kod nadležnog organa u skladu sa važećim propisima o udruženjima i fondacijama (u daljem tekstu: Priređivači tombole).

Član 3.

Tombola se priređuje na osnovu odobrenja Središnjeg ureda Porezne uprave Federacije Bosne i Hercegovine (u daljem tekstu: Središnji ured Porezne uprave), koje se izdaje u skladu sa Zakonom o igrama na sreću („Službene novine Federacije BiH“, br. 48/15 i 60/15, u daljem tekstu: Zakon).

II. PROSTORNI I TEHNIČKI USLOVI ZA PRIREĐIVANJE TOMBOLE

Član 4.

- (1) Prostori u kojima se priređuje Tombola, moraju ispunjavati odgovarajuće higijensko-sanitarne uslove propisane posebnim propisima koji uređuju tu oblast i ne smiju imati površinu manju od 50 m².
- (2) Prostori iz stava (1) ovog člana se ne smiju nalaziti na udaljenosti manjoj od 100 m od vjerskih objekata, te osnovnih i srednjih škola.
- (3) Kao dokaz o ispunjenosti uslova iz stava (2) ovog člana, priređivači tombole su dužni u svrhu izdavanja odobrenja Središnjem uredu Porezne uprave dostaviti relevantan dokument izdat od strane nadležne općinske službe na čijoj se teritoriji nalazi lokacija prostora u kome će se priređivati Tombola (izvod iz kopije katastarskog plana sa pismenim zaključkom o udaljenosti, potvrda, nalaz komisije ili dr.).

Član 5.

Priređivači Tombole moraju posjedovati slijedeću opremu:

- a) providni bubanj sa automatskim izbacivanjem loptica za igru,
- b) elektronski brojač izvučenih loptica za igru sa semaforom,
- c) elektronsku (ekransku) tablu sa svijetlećim brojevima ili računarski sistem za praćenje izvlačenja sa odgovarajućim uređajem za prikazivanje rezultata,
- d) adekvatno ozvučenje instalirano u prostorijama u kojima se priređuje Tombola.

Član 6.

Priređivač tombole je dužan na vidnom mjestu unutar prostora u kome se priređuje Tombola istaći odobrenje iz člana 3. ovog Pravilnika.

III. IZDAVANJE, EVIDENTIRANJE, PRODAJA, SADRŽAJ I IZGLED TOMBOLSKIH KARTICA

Član 7.

- (1) Priređivači tombole mogu priređivati Tombolu isključivo putem tombolskih kartica koje su izdate i evidentirane od strane Središnjeg ureda Porezne uprave.
- (2) Prilikom preuzimanja tombolskih kartica priređivači tombole plaćaju naknadu za izdavanje kartica, čiju visinu propisuje Središnji ured porezne uprave na način da ista mora pokriti troškove nabavke odnosno štampanja i distribucije kartica.
- (3) Središnji ured Porezne uprave utvrđuje jedinstvenu cijenu tombolskih kartica za sve priređivače tombole.
- (4) Priređivači tombole su dužni prilikom priređivanja Tombole pridržavati se cijene tombolskih kartica utvrđene u skladu sa stavom (3) ovog člana.

Član 8.

- (1) Tombolska kartica glasi na donosioca.
- (2) Učesnikom u tomboli smatra se imalac neoštećene tombolske kartice koja pripada seriji tombolskih kartica objavljenoj neposredno prije izvlačenja za svaku igru posebno.

Član 9.

- (1) Priređivači Tombole prodaju tombolske kartice u serijama koje se označavaju rednim brojem ili slovom.
- (2) Serija je raspoređena u blokove koje čine listovi od po šest kartica, pri čemu se prodaja tombolskih kartica igračima vrši po redoslijedu pakovanja u blok i učesnik u igri ih ne može proizvoljno birati.
- (3) Serija serija ne može sadržavati više od 2000 kartica koje su redom numerisane.

- (4) Svaka tombolska kartica ima oznaku boje serije i slovnu oznaku serije označenu velikim slovima abecede (npr. žuta serija A, plava serija B, crvena serija C, itd.) i redni broj kartice (četiri cifre).
- (5) Na prednjoj strani kartice odštampana je jedna kombinacija koja predstavlja petnaest različitih brojeva u intervalu od jedan do 90, koji su poredani u tri horizontalna reda po pet brojeva.
- (6) Na zadnjoj strani svake kartice odštampane su odredbe st. (1) do (5) ovog člana.

Član 10.¹

- (1) *Tombolske kartice se štampaju na listovima od po šest tombolskih kartica (u daljem tekstu „Listovi sa karticama“), na način propisan članom 9. st. (2) do (6) ovog Pravilnika.*
- (2) *Listovi sa karticama, u zavisnosti od određene cijene, štampaju se na offsetnom papiru 80 gr/m² u serijama od tri boje i to:*
 - a) *žuta,*
 - b) *plava,*
 - c) *crvena*
- (3) *U gornjem dijelu lista sa karticama, u širini 25 mm, mora biti odštampana namjenska zaštitna boja (pri čemu će se šifre boje odrediti u fazi štampanja tombolskih kartica), na kojoj je crnom bojom odštampan naziv „POREZNA UPRAVA FEDERACIJE BOSNE I HERCEGOVINE“ preko kojeg je utisnut suhi žig dimenzija 10 x 60 mm sa nazivom „Porezna uprava Federacije Bosne i Hercegovine“. U donjem dijelu lista, posebno za svaki list sa karticama mora biti odštampan bar kod, kao i cijena lista.*
- (4) *Dimenzije listova sa karticama su 180 x 85 mm.*
- (5) *Tonska podloga listova sa karticama je urađena u žutoj, plavoj i crvenoj boji u zavisnosti od određene cijene, tako da je protkana linijskim rasterom koji popunjava polje sa brojevima, koji su štampani sa crnom bojom kao i ostali tekst na kartici (serija, cijena i numeracija).“*

Član 11.

Priređivač tombole je dužan da vodi evidencije o:

- a) broju tombolskih kartica preuzetih od strane Porezne uprave i prodanih igračima (po brojevima, serijama, datumima prodaje i količini),
- b) broju neprodanih tombolskih kartica (po brojevima, serijama, datumima prodaje i količini)
- c) ostvarenim dobitcima (po vrsti i vrijednosti).

Član 11a.²

Porezna uprava je dužna da uspostavi bazu podataka o izdatim tombolskim karticama – listovima, sa nazivom priređivača tombole, datumom izdavanja odnosno

¹ Službene novine Federacije BiH broj 44/17

² Službene novine Federacije BiH broj 44/17

prodaje tombolskih kartica-listova, brojem serije i brojem bar koda za svaki list posebno“

Član 12.

U toku jednog izvlačenja, priređivač tombole ne može upotrebljavati kartice iz više serija.

IV. PRELAZNE I ZAVRŠNE ODREDBE

Član 13.

- (1) Porezna uprava će najdalje u roku od šest mjeseci od dana stupanja na snagu ovog Pravilnika, okončati aktivnosti u vezi sa nabavkom, štampanjem i stavljanjem u promet tombolskih kartica propisanih ovim Pravilnikom.
- (2) Do okončanja aktivnosti iz stava (1) ovog člana, priređivači tombole mogu prodavati tombolske kartice izdate u skladu sa Zakonom o igrama na sreću („Službene novine Federacije BiH“, br. 1/02 i 40/10), pri čemu je Porezna uprava dužna da u saradnji sa Lutrijom Bosne i Hercegovine obezbjedi kontinuirano vođenje evidencije o broju izdatih kartica.

Član 14.

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“.

NESLUŽBENO PREČIŠĆENI TEKST